

## FINTREMAI CHE DUT AL PARTÌS DI ROME...

Nol po jessi vêr che i sorestants di un Stât a fasin a pueste di guviernâlu malementri o che a vebin gust di fâ dutis lis robis ledrosis. Dopo dut, al è ancje l'ôr interès di contentâ plui int che a puedin, massime co la l'ôr permanence sul cadreghin e dipent pôc o trop ancje de volontât dal popul. E alore si po crodi che ancje il guvier talian di cumò al ciri di fâ miôr che al po par judâ lis cent mil dibisugnis di cheste biade nazion.

Ma al à trê cuatri pecjis tal mani che lu imberdein, in part ereditadis dai guviers passâts, in part nassudis de situazion di dopo la vuere. La prime e je la venalitât vergognose de burocrazie che no si môf se no si onzin lis ruedis. E no si trate nome dal machinari metût adun sot la steme dal manarin: si trate dal personâl che al è dibot in ogni ufizi chel istès di prin, cun chê stesse mentalitât, cun chei istès vîzîs, e plen di sperance e di voie di conservâ dute la sô paronance sul andament di dutis lis cjossis.

Une altre grande pecje e je chê di subordenâ dut al interès dal partît. E pazienze inmò se si cjalàs nome il vêr interès dal partît, che dopo dut al è l'interès di un grum di int: il mâl al è chest, che masse dispès si crôt che al sei interès dal partît chel che al è nome interès di une persone influente o di une criche di gramolons; e altris voltis si va daûr des ombris o dai scrupui di cualchidun che al viôt la code dal diaul in ducj i sîts, che al crôt di jessi svelt a fâ simpri l'incontrari di ce che a voessin fâ chei che a son di un altri trop.

Une altre inmò e je la pocje risolucion dai parons dal vapôr che a son simpri sclâfs dal "tabù" nazionalistic, che no son rivâts adore di dispueâsi des superstizions patriotichis dal secul passât ni di chês dai "vincj agns", che no viodin une cuarte di là dal nâs e invezit di cjalâ l'interès coletîf di vuê e di doman, si lassin inmò indreçâ di chel spirt militaristic e imperialistic che nus à menâts inte buse.

Ma se ancje dutis chestis pecjis a vignissin eliminadis, a'nd i restarès une altre che e bastarès di bessole a fâ lâ strucje ogni buine intenzion e a fâ strassâ malementri la plui part des risorsis. E ancje cheste e je propi tal mani.

Milions e miliarts a jessin ogni dì des cassis dal Stât: millions e miliarts nestrîs, gjavâts des nestrîs venis, parcè che il Stât nol è un cjamp di forment, che al bute un tant al an. Lavôrs publics, contribuzions, sovenzions par une opare o par chê altre, par tignî in pîts barachis destinadis a sdrumâsi, par metint sù altris provisoriis che no podaran durâ ni zovâ, par contentâ mil gramulis spalancadis, par fâ tasê mil protestis e mil laments. E cun ce criteri il

guvier fasial la sielte tra tantis domandis e tantis pressions? Nol cul criteri des plui grandis necessitâts ni de premure ni de vere utilitât: ma nome cun chel de plui pôre e daûr des sburtadis di cualchi persone plui influent o daûr des onzudis plui bondantis di cui che al à plui... onzint. Dut al dipent di alçâ une vore la vôs, magari fasint nassi cualchi disordin, o di vê un bon santul a Rome, che al sepi mostrâ lis robis de bande juste. Cussì vuê al ven sovenzionât un istitût, che al à salacor mancul bisugne di altris cent; al ven inviât un lavôr colossâl di pocje o di nissune utilitât; al ven strassât un capitâl a fâ propagande nazionalistiche o a ingrassâ gjornâi e rivistis in mans di fassiscj, che a spandin il lôr tuessin indulà che e larès fate opare di pacificazion e di concuardie.

E cun dute la buine volontât, nol po jessi diferent, fintremai che dut al partìs di Rome e dut al finìs a Rome. Rome e cognòs dutis robis par sintîlis a dí: dut al dipent di savêlis contâ, di savê fâ viodi e massime di savê fâ pôre. Dut al dipent di vê là jù une buine vôs che zighi a fuart e che no si lassi mancjâ il flât. Cetantis carognadis o macacadis di mancul no vignaressino fûr, se la sielte e la distribuzion a vignissin fatis plui da vizin, sul puest, regjon par regjon, indulà che lis necessitâts e lis urgjencis a puedin jessi cognossudis e misuradis diretementi, e indulà che ducj si podarès tignî di voli la aministrazion di chei mieçs che a son di ducj?

josef marchet - Patrie dal Friûl / mai 1950